

元明史料叢編 第三輯

明大政纂要(十二)

明·譚希思撰

六十三卷 (清·光緒思賢書局刊本)

文海出版社 有限公司 印行

中華民國七十七年六月出版

元明史料叢編

第三輯

精裝：四十冊
定價：新台幣三〇、〇〇〇元

主編者：沈

雲

龍

發行人：李

振

華

台北縣永和中興街133巷8號

出版者：文海出版社有限公司

郵政劃撥戶第〇〇〇二七八四—三號

電話：九二一二六五九號

印刷者：高威印刷企業有限公司

台北市西園路二段320巷55弄28號

經銷者：臺灣全省各大書局

明大政纂要卷之六十

明都察院右副都御史四川巡撫茶陵譚希思編輯

嘉靖四十三年甲子春正月乙亥朔

虜犯遼東

東虜土蠻黑石炭等糾眾萬餘犯一片石黃土嶺參將白文智據牆禦之晝夜急攻不克已而總兵胡鎮巡撫溫景葵督遊擊董一元等兵至協力拒守賊知我有備復轉攻山海關不克乃遁

增築甕城於重城永等七門

二月詔削伊王與楨爵錮皇陵

典楨自都御史張永明奏發其惡其後御史林潤給事中邱岳相繼言之凡遣科臣及大臣往勘者二備得非法狀上初

猶曲宥之革其祿米三之二令毀其僭越宮殿歸所強奪良家子女悉出撥置羣小付有司論如法旨凡三四下至停河南撫按官俸督趣之典模迄不奉詔於是巡撫副都御史胡堯臣巡按御史顏鯨會奏伊王兇頑成癖無復人心放縱怙終盡忘臣禮其僭擬天居希冀非望節經中外諸臣參奏亦已甚明至如逼殘民眾炮烙人屍則如陳大壯之幽冤立致滅門骨肉都盡則如聶氏等之慘刻其搶攘良人之妻女則如周氏小補姐等至四百餘口強占官民之房屋則如方城王滿倣等至三千餘間其詐騙民財則如張學記吳江等三萬餘兩其流毒不止及於士民雖如雙流郡主咸寧郡主骨肉之親亦擄其娣媵而破其家其遺殃不特徧於郡縣雖如薄姬祠龍王廟天津古橋東漢諸陵亦毀其遺址而翦其木

植護衛儀衛餘丁奉旨革奪乃榜示遠近拘令赴府供役一
如其舊七月中有錦衣衛官校勾當陝西公事道經洛陽卽
擁至該府傳呼河南府衛官吏朝服入接故用黃紙一封捧
藏於內竟不開讀眾問何詔卽令府校宣言爾輩若有亂言
卽應斬首眾皆錯愕而退王父子乃大張宴樂酣飲達旦官
校歡呼聲震四外故裝疑局搖惑遠近又遣官校張禮等至
雲南估製鑲鎧皮甲而於該府鳩匠假造甲冑六百副槍三
千杆鑄打火炮佛郎機數百座一日父子戎裝率其宗儀校
從控弦持戟千騎前驅出城至河南衛教場演武竟日放大
將軍等火器而還此其舉動乖張形迹不軌不可不亟爲之
處且私闡宦侍林柰李暘等三百有奇皆冒挂宮錦充勅班
行招集亡命周晃董堂等百有餘輩皆給與職銜披以冠帶

阻截洛河通津擅立抽分稅廠乃取聖箴敬一二字名其循環稅簿近奉嚴旨責取元惡席連金印等堅執不發其無辜良民非刑幽繫如任世連等猶未釋放先所強奪良家妻女多占恡不出間或出屍予之近又傳令旨將河南府城四門盡閉徧索人家女子十二歲以上者七百有餘盡納府中畱其美麗九十人其餘悉令具金取贖至於一切違式宮室重城五門層樓東廠悉雄峙如故而乃明肆誑誣謂屋無半分之僭宮無一民之女天可欺乎近日河南各官以明旨久稽部牒督趣同入見王乃曰無多言此徒充粘窗櫺用耳又曰外城亦何用拆毀天生我才當必有用眾乃大駭諸所更正攘奪地土占據不容原主管業布置羣小京城內外達於洛陽以爲爪牙耳目朝廷機政不三日卽得其始末意所嫌恨

刃交其胷道路以目惟望亟賜宸斷割恩正法疏入詔禮部會三法司議宜如徽王載堉事例上令姑革爵爲庶人禁錮高牆削除世封其撥置人等論死發遣者一百五十餘人典榷旣敗有司籍沒其貲封府庫候旨及巡撫遲鳳翔奏以伊府產祿易銀充各王府祿糧及軍民振濟之用上從之其徵入內庫者違禁寶器及銀八萬兩而已

湖廣荊州府知府徐學謨等赴部調用

初荊州府有沙市綰轂要路商民多占宅其中以居貨物於是景府諸官校啟王強收爲業學謨禁勿予第議每歲以銀二千兩輸之時分封之始索租使者相望於道皆橫甚佃農漁戶不利屬本府往往棄業而逃沔陽州同知阮自嵩漢川知縣昌應會不能禁王怒因特馳奏奸民抗違皆官吏陰爲

之主下法司覆勘因令三臣俱赴部調用

韓府宗室越關至陝西會城索逋祿

巡撫副都御史陳其學以聞初韓府分封平涼歲徵祿糧銀六萬兩有奇至是宗室繁衍占名者千餘人歲祿糧銀增至十萬五千餘兩歲額不及其半故節年積逋至六十餘萬有奇平涼故遷地鮮生業土風獷悍故宗室視各王府尤稱無賴往韓王融燧有憾於巡撫裴紳縱諸宗凌鑠之諸宗因乘機毆辱知府邵大爵朝廷以其人眾寬之至是諸宗益橫悍羣聚入會城環巡撫陳其學鼓譟詬詈其學爲此不啟門者數日諸宗乃掉臂奮腕橫肆閭里閒公行搶奪百姓恇擾競言王子反以至巷無行人長安爲罷市其學檄布政司借發各項銀四萬七千餘兩及疏下奉旨復括各項銀三萬一千

兩解送該府而各宗顧益狂暴撞擊畱會城不肯去於是其學與巡按御史鮑承廕疏言其狀上怒切責融燧令嚴加鈐束下各宗輔導官及撥置諸奸於御史問令分別諸宗首從從實奏聞已承廕奉旨覈上首惡奉國將軍融燧爲庶人禁住閒宅其餘各奪祿米二月融燧降敕戒諭之

詔停戶部郎中催儹錢糧運差

註選京倉主事五員通倉三員俱以三年爲限滿日回部裁革經歷六員

巡撫宣府副都御史楊巍予告

武定州土舍鳳繼祖聽撫

初繼祖旣逐索林據州治巡按御史孫用請討之詔下撫按議會副都御史敖宗慶代任乃集土漢兵擊之殺其弟繼英

衆潰繼祖乃逃避江外鎮巡官議晉土兵二千名令都指揮王世科守備金堂將之守武定是時武定民爲繼祖積威所劫日夜數驚索林竟不敢居府治避處富民繼祖乘虛復入武定於是鎮巡議復大徵土漢兵繼祖聞之懼請獻贖罪銀一千五百兩願分普渡河外四莊自贍永奉約束鎮巡官許之巡按王諍遂以其事聞且敘世科等及副使殷正茂等功請賞其罪令支俸如故兵部覆上其議許之

閏二月禮部覆南道御史史官所陳京直鄉試事宜

一今後兩京主考不用本省人如資序挨及南人用北北人用南以別嫌疑一同考用京官進士出身者易詩書各二員春秋禮記各一員其餘參之教官以便覺察一謄錄用書手對讀用生員以防洗改但此三事專爲兩京鄉試而設其各

省及會試亦當因其說而廣之因更上六事一會試及兩京鄉試監試官預於二十日前選差以便防範一巡視按檢務加嚴慎以杜奸弊一各省務精選才望內簾官無令外簾干預去取一申明各處科舉名數照原解額每舉人一名取應舉生儒二十五名一中式之文務從簡實凡浮靡冗雜詭僻不經悉行黜汰仍參取後場以采實學一解原卷到部以憑稽查不用公據得旨各省鄉試俱照舊規令監臨官公同考官揭書出題提調監試等官不得干預餘皆如議行

命嚴訥李春芳董份俱直西苑
如勲輔臣例

福建汀漳二府盜與江西寇合漳平知縣魏文瑞死之
三月原任南京光祿寺卿張袞卒

袞直隸江陰人上追念其經筵史局效勞特賜祭一壇給全葬

扶溝縣民盧欽詣闕獻其孫女

詔納入宮賜欽父子銀幣復其家

贈福建武生薛天申爲指揮僉事

附祀鄉賢廕其子爲冠帶總旗陞泉州衛舍人周岳鎮子一級天申晉江縣學生從軍至冠帶把總先是賊犯興化泉州衛天申與岳鎮俱隨指揮歐陽深禦之陷伏中俱死事聞詔先卹錄深下二人事於巡按勘報至是覆實乃有是命

沈束妻張氏上願代夫囚疏

疏曰臣夫沈束叨中嘉靖二十二年進士除授直隸徽州府推官續蒙行取選授禮科給事中束猥以愚昧之性妄冒建

言誠當萬死荷蒙皇上寬宥下獄待罪經今一十四年束上有老親下無子女孤苦伶仃俯仰無賴止遺臣一身寄居旅舍早暮力作女工以供口食艱難萬狀度日如年臣夫之父今年八十有九衰病侵尋風燭不定養生喪死之具更無可託臣煢煢寡妻顧此失彼欲歸以養舅則夫之饘粥無資欲畱以給夫則舅又旦夕待盡臣夫束纍囚之臣誠不敢復顧私家竊覩聖朝仁恩曠蕩庶類樂生豈臣一門窮苦顛連自遺覆載之外臣每自念何惜一死所以忍苦苟延者誠望天地有曲全之仁雨露無不被之澤也今臣舅已當垂死之年臣夫未有再生之日臣願以身代夫繫獄暫容臣夫送父年終仍入赴獄待罪庶使臣夫得復見其父可伸父子之情臣以舅付託於夫亦得全夫婦之義則臣舉家感戴天恩萬代

明史紀事本末卷之二十一
銜結圖報無窮矣疏入不報

夏四月令巡撫山東右副都御史張鑑回籍聽用

陞太僕寺卿鮑象賢爲戶部右侍郎兼僉都御史代之鑑在山東行均田保甲之法又募民間墾荒田民多不便者於是吏科都給事中趙均等交章言其舉動煩苛更張無漸羣情惶駭恐生亂階乞亟罷鑑而別選老成持重者往代故有是命

貴州撫臣吳繼嶽招土酋楊珂降之

先是都勻府平州長官楊進雄貪殘兇忍土民苦之進雄初無子以其兄楊祿子珂爲嗣後生子治安而疏珂珂怨望進雄欲殺之不果乃盡奪珂產並其父子逐之珂用事久得土民心一旦見逐遂與羣苗爲亂據唐宿囤再攻進雄各疏訐

奏詔下撫按官勘處副都御史趙鉞以進雄不法失眾逮之
獄檄獨山土酋蒙繼武禁諭珂令歸命而許司民更土爲流
以安之治安計不便乃陰許以司轄六洞地賂繼武借兵自
護繼武乃發兵攻珂斬首二百級復平州珂走廣西泗城繼
武遂耕墾六洞地六洞民不服復助珂與繼武相攻久之繼
武兵疲轉餉亦不繼於是珂得復據平州然創殘之後不復
能軍矣及是維嶽遣都勻府推官胡校招之許以不死先降
其父楊祿及苗長四人珂自縛詣軍門降六洞遂安至是維
嶽上其功且請改土官爲流以絕後患兵部請就陞胡校爲
本府同知而賞維嶽及總兵石邦憲等且令宣諭珂與六洞
之民及議善後事宜以聞報可維嶽等各賞銀幣有差

陞按察使汪道昆爲僉都御史巡撫福建

五月更定邊方督撫官考績例

僉都三年滿陞副都副都陞侍郎俱如舊其陞廕在常數之外者如僉都廕子副都給二品服俸誥命止許行之極邊仍候臨期奏處其山西保定陝西近邊之地不得概給或雖係極邊而任內功少亦不得給止以考滿應得恩典雖曾以別項軍功蒙恩相等亦准重加若三年之內帶有別俸通理者必邊俸居三分之二方得題請時巡撫山西右僉都御史楊宗氣考滿吏部擬陞右副都御史仍舊巡撫而不及廕子因請少更舊法使邊臣不得援特恩以爲例從之

乙卯上夜坐庭中御幄後忽獲一桃

左右或見桃從空中墮上喜曰天賜也修迎恩典五日明日復有一桃降其夜白兔生二子上益喜諭禮部謝玄告廟未